

四庫全書

集部

欽定四庫全書

集部

凌忠介集卷二

詳校官編修臣錢樾

侍讀臣孫球覆勘

總校官編修臣倉聖脈

校對官編修臣盧遂

謄錄監生臣馬堃

欽定四庫全書

集部六

凌忠介公集

別集類五

明

提要

臣等謹案凌忠介集六卷明凌義渠撰義渠字駿甫烏程人天啓乙丑進士官至大理寺卿流賊陷京師自經死福王時追贈刑部尚書謚忠清

國朝賜謚忠介事蹟具明史本傳義渠少以制義知

名其清新婉約極為世所傳誦服官後以清操直節受知莊烈帝於文章不甚留意此集凡詩四卷文二卷乃其友徐汧門人姜垓所校定中間不載奏疏一門故平生建白如為給事中時請原三河知縣劉煒責償餉銀疏論亂民焚掠巨室疏論大臣箝制言路疏論中樞不職疏預策東江叛亂及請陽撫陰勸諸疏皆其風采之卓卓者今並不見於本集

則編次時已不免有所脫遺然如兵餉議清
慎勤論諸篇剛毅自立之象凜然猶可概見
其崇化論有云能為逢比者視碎首濺血仍
無異於退食委蛇能為申生伯奇者視抱石
雉經仍無異於問安視膳蓋生平立志如此
卒之見危授命克踐其言足為千古完人不
必以詩文之工拙論也乾隆四十六年閏五
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

凌忠介公集卷一

明 凌義渠 撰

詩

秋懷

曾聞燕市花培根出土穴扶疎能幾時生意蚤萎折相
傳利州石暴長四十尺物苟昧其天非祥遂為孽旁行
笑獨行紆捷取相絜獨行勝旁行差能免蹉跌石上一

寸蒲稜稜八九節黃楊雖厄閨終不犯寒熱如彼綠柳
兒故當耐其拙併置屏几間聊復從所悅

又

昔有嗜癖癖雅非醫所療昌歎與醋芹難為饒腹道或
以黑為美神君先祀竈掠食及蟲蛙醲過八珍芼鈞天
未擬聽鴉鳴不言噪舌本既參差識情遞眩眊若以從
旁觀誰正誰為倒茲理故難齊澠溜有時冒大江日夜
流無風亦浩浩

又

東西歛易失白日遂蹉跎零露渥未已亦復徧庭莎
俛歲方晏誰與起沉痾懸的紛相射方書費編摩五臟
如能語一味已云多有樊輕可闔層阜為陂陀驅車誇
疾走將無慎軾軻精良問硤确隱隱待甄磨神明如不
昧義馭且回戈莫學三眠柳迎秋早婆娑

又

松柏藹相歡芝蕙潛相惻無間似天親有懷堅可泐
媿

彼悠悠子緣情事雕飾蓄意待仁賢論交寧取啻鸚鵡
戀故羣同憂不避溼濡翮以抃焚人嗤嗤亦得

池陽問羅師撤瑟晨已百日矣因稍次聲淚為句
以雪余慟尚未忍作挽章也

夙昔登堂約茲遊難復論擬到漸生畏銜悲俄及門霜
霰逼人栗空堂影翻翻几格慘灰色童僕意沮煩破胸
聊一哭仰視噤無言幽明炯可照為我或聲吞空餘千
古業孤稚未知尊孀閨抱寒石春晝不生溫忍見衰莫

翁舉止半蹇屯臨去何當
跼蹐百感繁出門幾回首
步步強追援九子奪眉青
所愁風雨掀還持一掬淚
曉夜感精鬼相關自有故
不獨為酬恩

訪賈道乾天寧寺不值

去城纔數武趾趾得幽尋
喜見僧儀肅翻悲塵思侵
暫依牀几淨共語塢鈴深
寂默如相待閒房幾樹陰

寄懷臨川章大力

癸亥十月予夢大力折一桂枝分贈遂為前後

同門之識乙丑春日始晤于燕邸神情面貌髣髴夢中所見亦一奇也

望氣非一日于焉捉臂親乍看憶曾識猶疑夢中人君應修月手攜我踏桂輪桂枝樛相引恣汝斫為薪為余掬其一餉以紫羅巾有月明可掇捫體滑如銀覺來香遶枕口口咽餘津誰能精物隱感寤在茲晨對君一樽酒其故乃可論吾師九秋榦掇皮皆天真冥心寄尺幅有願無不伸玉曜併瓦質所荷同一甄君詞多詭峭君

意何溫淳荀韓原道德機設別有因後先緣最巧睽合
聽于神獨慙蚊蟲影配擬本非倫稍知尊所慕竭心以
自忤忍遽辭我去門外即風塵奇光深自惜歷古未為
珍願與貞斯義別語不嫌諄再見桂華滿心心託秋旻
殘夢猶堪續宛在江之濶

報國寺變窰觀音恭紀十八韻

慈聖渺西極欽然飛向東低迴哲匠手來往洪鑪中一
氣相魂魄千燈眩色空妍媸隨所願土火妬潜通盱嚷

人如見希微影乍濛居然雙寶絡屹坐碧蓮筒引夢依
番舶拈花出上宮侵晨意肅肅望夜光熊熊膜拜恩長
在摩挲體漸融寒生翠鬢薄定入紫紗籠飼暴肌能割
分甘乳作潼投身棲海蛤傾蓋護潭龍陡可藏淵嶽時
能幻蟻蠓詎云明狡獪以此震愚聾揄袖俄將去低眉
宛欲逢水雲增灩澦雷雨殷豐隆有色施朝槿無言疑
夏蟲偶然躍冶出天地若為功

鏡聽詞

有美一人花非花真珠飾履薄檀苴將身抱鏡情較嬾
躊躇留待兩三伴出門預愁人語還無情歌哭免浪傳
小駐勾欄聲向息似隱似明占以臆為看歸步漸坎坷
行行中露夜如何

汶陽懷范香令

一泓繞郭細生鱗風日含情早覺春應記他年半面好
偶然茲地宰官身懷磚樹碣尋常事說夢言愁宜此人
不道政成頻去掃行來步步惜香塵

病起

徒言百歲賒宛轉隨塵蟻習茶詎識苦瀕危乃清切萬
鈞懸一絲鼠齧垂垂絕秋瓜摘漸稀層冰踏將裂銖銖
悉上心神鬼紛相掣遑復念其餘我躬自不閱常憂食
未充至此方知噎橫身熾炭爐至此纔言熱晨鐘一以
扣幃燈晃明滅及爾未滅時微光尚可掇

又

乞取孱驅在形魂相見初轉覺無繫著哀至不能紓何

以息諸妄一夢且遽遽空隙度微月光影本來虛再須
拾爪髮重與整簪裾見人肅拜跪裏頭對詩書視息苟
未免吾敢厭囚拘邈茲千古意流歎在居諸居諸我不
違過此將何如

和章爰發秋夢詩

爰發夢一異人授
以斬慧守拙四字

分明熱燄裏一枕借虛涼看劍難言利抽絲俄覺長夜
分魂氣肅燈暗影神忙起滅知何極紛然不可量

又

一畫淪陰劫中天散積暉男兒須用殺智者好藏機蚤
以攻為守當緣戰始肥葛藤牽未了斬却乃言歸

寺中觀吳道子畫水

千年壁畫伊誰始觀者但言吳道子即覺萬仞躍空間
歛神對之尺有咫奔勢疑將裂壁飛夜夜殷濤撼雙耳
落月斜窺冷欲翻俄聽霜鐘曙初起天女時披無縫衣
抱香獨自愁沾履連雲城闕早風烟黃河故道久遷徙
有唐以後歷物多終朝如在簸淘裏眼看長川去不迴

澹澹一杯來何已

代枯魚過河泣

高天垂幕兮大地為果有泉可漱兮靡穴能幽身膏砧
几兮影落清流漏石分沙兮蘋沫香浮漩渦蕩漾兮雁
鷺交儔魴鱖唯唯兮不念舊遊血黴脂駝曝身鮑肆兮
將焉求

又

四大雖堅微風可析嗔愛所纏晴雷為霹嗟爾鱗鱗與

波俱汨其鬣朱殷其肪肥晳上下龍門相詫無敵有淚
如縻慘淡沙礫意在惜羣戒心及溺彼岸可登視此一
滴

又

有物相同兮河之滸瀝血為酒兮擘肌為脯掠而近之
香生嚙兮似饑兒之渴乳側身傍徨兮尚未敢直前而
偃俯過者蹠足而疾呼兮涕淫淫其旁午吁嗟夫欲吞
未吞兮余心最苦

邢臺豫讓祠

觸地摩天誓力深，憑將光響矚城陰。
衆人國士分明語，未肯模糊是此心。

晚涉大江

鎮日苦風掀，爲予偶屏息。
江容狎可親，面面揉藍碧。
返照結寒姿，羣峰紛向夕。
潛鱗同浴鷺，上下吹紅沫。
忽焉矗若屏，兩岸劃千尺。
烟中不辨誰，鴉軋聲相及。
排檣如芒捰，倚竿出樓脊。
人語喧覆舟，遠渡歸帆急。
何處白茫

茫愁來暫可戢

望金山

複疊開三面玲瓏豎一拳雲根兼月湧花萼借春妍穩
載同浮宅孤擎到遠天遲迴嵐氣合星火出層巔

又

不少登臨興無如眺聽親寒潮侵古剝突石臥奇人注
水添眉目經冬損笑顰宛成盆盎景鷗鷺盡天真

東熊玄年有懷金正希太史尹宣子進士

熱耳時名各占先
忖疑霏映自山川
難為兄弟稱三子
驟許心交得兩賢
止觀澄澄曾對默
機情濯濯偶相憐
饒君舉體能兼美
媿我追隨獨惘然

易曦侯自楚致訊因寄諸子近藝

江漢紀南國精靈何皦皦
百物府其中雲霞以為表
盛滿泄文章猥大不能少
易生有私憂研心及昏曉
淳意準竒思循循以自考
謂予言不謬避人相追討
疑時皆欲張笑來頭屢掉
其所偕遊者人人領慧早
共知寶其

天一朴藏餘巧爪孽透血痕孰云茲技小片紙涉江來
歲莫新懷抱蠟梅破微馨映之香逾矯一讀一尋思字
字耐深香

花朝

時維春半意何求的皪花情妙在幽自此片光兼片影
端然宜笑亦宜愁輕陰拂拂初能染淺渚泠泠適可遊
無那午炊夢正熟一絲飄墮鄂君舟

蘭詞

縹蓋兮紫英弱彩兮低榮
顏嫺閨性兮香不外散近摻
手而含貞無何白晝兮啼鴉
流哀百草靡香兮山礬艷
開一寸相思兮一寸斜暉
坎心瘞汝兮待月同歸

右代
輓

又

曷予藝之恩不汝久曷予慕之香不汝守曷予紉之招
匪印友猗彼稚節兮山崦水涯靜言一室兮心影攸宜
蓄意澆培兮護此根株胡所避忌兮蟲蟻先驅沉沉結
夢兮夢同止翩其來遲兮待君子

右代
招

舟雨怨

歡情并苦緒夜語到流連
小雨差能聽殘燈尚及眠
有聲相爾汝無路懺人天
低掩蓬窓下更深各悄然

又

驀見蒼茫色愁凝春事中
是歌皆懊惱何物似心忡
花老將辭蒂人歸或化虹
依風語斷續祇覺太匆匆

雜憶詩

休文有六憶詩余稍變其體
廣之得十焉凡以

旁繹幽微庶幾竄意風雅抑憶之為言意也第
云意而已矣何必有其人也

燭花影簇小垂鬟不待回眸意已闕漸近雞鳴如有失
明星落落一人還見

又

尋常寐熟日西斜女伴催粧去踏花幽素天然無可著
一痕檀粉落窓紗粧

又

夏日初長最泥人半甌擎到強沾脣年來守淨誠何意
蔬筍無多引飭頻餐

又

曾淹靜夜語移時不定花魂碎未持是鬢生香香附鬢
微粘枕畔氣絲絲眠

又

繡被重蒙如未安日光逗處怯幽單慵深勉自扶頭起
祇為陪郎及早餐起

又

侍兒引鏡衰紅顙忽忽粧成箇費猜或是隔簾傳鵲訊
今朝喚得可人來

喜

又

斟酌姮娥耐素秋蛩心響答五更頭經年病渴知能遣
愛掩雙扉境暫幽

病

又

頻看星漢夜何其秉燭追歡任所嬉憎汝藏鉤不厭數

教人眼下恨生離

戲舊記藏鈎之戲使人
生離或言古語有徵也

又

頗饒孤韻略逢迎小喜近前面發禪眼底何人差免俗

儂心歷歷怨分明

喚

又

風前一搦脆飛絲淪落青衫共濕時夜夜城烏啼徹曙

翻將新句比紅兒

愁

後襍憶詩

蠲煩破癩却無方濃淡參差綴一行貪侍文人燈影後
照來難字未曾忘

箋

又

愛拈香箋寄幽貞持近蘭邊薄有神但說同心還自惜
烟中露下憶前身

染

又

側側瓶梅伴月聞小樓密坐到微醺無端點著心頭事
聚入眉梢又幾分

醉

又

別有清思寂未傳
妙香初試颯成烟
相逢祇自疑唐突
却立逡巡不敢前

默

又

芳姿入夢較難尋
側聽微聞嚙好音
花影低垂星月皎
他生何處託心心

語

又

鬆來條脫擲還收
生小無拘得自由
可是嬌慵可是悶

闌干倚遍未梳頭

癡

又

狼籍尋芳悔獨遲
殘鶯空復立殘枝
問誰曾拂當年面
的的春光十五時

雅

又

靜掩鑪香氣尚溫
隨風栩栩近黃昏
有人耳畔低聲叫
收得枝頭一縷魂

夢

又

孤鴻流影怯成雙
曲徑苔深護小厖
晨起樓端凝盼久
待將秋色到前窓

望

又

千年一別怨蹉跎
聽緩須臾可奈何
暗囑忘憂憂孰切
凭肩攜手掐痕多

稚兒識字歌

殘月輝輝惜夜短
為歡無間笑聲煖
捏藍塗皂各紛紜
偏汝攜毫未魯嬾
小小眼光貯幾字
字字能以意取譬

偶然道著喜點頭移時歛手默含羞偏傍形似易相亂
欲辨未辨試推求推求不了鼓催起亟從阿母索刀子
率然下堦忘所以一編翻覆燈光裏

戲為麥燈歌

婁東市中有以麥穗為燈者

隱隱金光一線起挑共華筵寂無語別將朴質試妍心
有人擘穗如擘紙莖葉旋枯葶膜在普作光明不相礙
仰看月影卜年豐中有老農擁襌襪春宵秘戲本無方
魚龍蹴踏爭低昂燭下風來餅餌香跼受明賜樂難忘

步尋竹潭

自可呼私路翳然隱一泓投錢聽共汲留影照微清竹
氣森能立苔紋斜與縈渟渟焉所託漱入芥香生

寄題鏡閣

山水清娛別有機翻成麗矚入芳菲相招宛自溪邊立
熟視如從鏡裏歸但靜見聞光寂寂頻移花鳥影依依
陰晴轉眼君難問夢鎖湖烟只掩扉

旅次聞隔壁碁子聲

一局覆清書停針輒按譜兩兩喧笑雜子落未遑數校
情孰爭先不擬孤注賭只此就郎嬉春殘或可補屬耳
偏有人徘徊至亭午花飛怕著身業除諸惱苦釧響隙
邊度影匿光吞吐聊試定中禪寂寂天機舞

又雨

蚤見雲開日依然雨接雲蘭蘭香並減燕燕濕為羣矯
首天如壓酣眠晝不分空堦滴陷處盡遣夢中聞

兩同年拉步禹陵因過南鎮

藉草穿莎總不妨同人牽涉上層岡
千年肝蠶如常在一度花春幾日忙
竦聽孤泉何剡剡平窺落照已荒荒
未須測註幽明理酒旆高懸指墓傍

不入西湖者幾年
兵偶以事至信宿即返留句自嘲

欲趁良時安可希
年年川陸迭相依
瞥來秋燕終如客
一往奔蹄獨畏羈
久失湖情能漸熟
滿擔行色又催歸
揮香露濕涼浮早
怪我無端與願違

再至湖上

紛紛道聽失驚呼暫借閒僧伴影孤何處谿山容酩酊
也教鷗鷺免羈縻逋早遊人事爭春晚不覺流光與歲徂
雲罩數峰並悄悄盡將生意入巖枯

春雨

妄意商晴雨沉綿嘆未休生苔將及榻抱卷欲登樓竟
日憑何遣孤衷祇自仇紛然多所念不暇為春憂

鄴中詩

微風觸樹冷修修
漳水依然咽舊流
何處高樓啼落月
久傳疑塚認荒丘
佳人南國經春鎖
公子西園愛夜遊
最是英雄多感慨
杜康今日好銷憂

又

俄聞霸業歸殘劫
尚許文心躡後塵
闌入四科皆韻士
戲拈百技總天人
彈碁握槊飛揚甚
剔面搔頭點綴頻
恰好蕭家堪並轡
後先燿燿更何論

又

百萬排空橫自驕仰天吠日一獐獠自關率土摧王氣
可有遺民數偽朝和尚來施降虎力橈槍下作掃宮妖
殿鈴風細愁無語洛度聲聲漫寂寥

又

建安舊事久紛紜斷碣耕餘故國墳知有璽符答聖瑞
天啟初元臨漳進玉璽偶遺螺黛賞奇文鬼神一窖工嘲謔史乘

千年訛見聞多少古人冤憤意好將雙頰拄斜曛
又

談仙白日等幽荒暫倚溫鄉望帝鄉
蛺蝶掠筵愁翅損
狐狸映月寫睂長
才人無賴容追夢
愛子多情與嫁殤
劍有王髦帶廓落
少年治習可曾忘

又

弩末纔知氣不揚
卧看崔石又顏唐
啾啾鶯語憐雙卵
累累蜂窠綴幾房
素旄單車行路哭
投戕解綬老臣忙
英魂未肯隨塵土
地下相逢揖少康

又

遺踪髣髴辨城闌未有黃金鑄幻身尚愛殘荷窺靨冷
強遮初月鬪蛾新神鍼夜夜愁拈指細襪年年穩踏塵
鍊色選聲真自可那能閒置洛川神

又

落日沉沉惜返戈當塗典午又如何中原驚見魚頭簇

謂鮮卑主
中原也

內殿傳稱狗脚多

古硯銘曰元魏
之季狗脚于鄴

未辨蟻牛

誰勝負可憐歌舞早婆娑唯餘一片銅臺瓦墨淚橫侵
不忍磨

夜薄杞城宋文王邀飲

百道思君似轉輪
適成邂逅此堪親
層雲隔面昏黃色
雪意盈盈埽玉人

又

嘹唳賓鴻慣惜羣
瞥逢燈下氣如雲
停杯有意頻凝矚
不遣飛觥到十分

又

為期燕邸重攜手
乍可尊前憶踏花
不淺風光拋擲盡

餘將禿鬢架烏紗

又

名山志業未容論
過眼青黃一度新
記得瀕行珍重語
不教個字及時人

又

並愛烟姿擢魄青
微風片雪近前楹
只言寒漏迎人永
叵耐樓頭又幾聲

舟臥聽雪

臘月如常暖茲宵覺未曾聽聲仍帶雨散粒乍為冰以
我客途始遙知寒思增與舟相嚙處徹夜凍層層

聞沈弱瞻病甚憶其平日語記之

淳篤自天性論文或嫌薄評君君自評意愜口無忤我
覺君仍厚靈光寄寸鑰按筆如帝臨惴惴欣有託未敢
欺世人言厄必懺削以茲困揣摩精神久落落

夜夢屍穢狼籍有類叢塚以古語占之豈將得官

耶拈筆一笑

凶吉何妨更倒顛
妍皮癡骨等秋烟
要知踏遍長安景
只似遊魂陌上看

又

嗔嫌此際忽狂歌
非想非因夢若何
世法營官官自腐
北邙留待市朝多

元日早起即事

村雞寒復澁
又覺五更時
門帖留新句
他鄉見古儀
所思聊復爾
有夢不容追
却愧主人意
艱難備一卮

閱同昌公主傳戲題玉兒九鸞釵

結此如烟質微嵌似玉名相攜同命脫各自戀身輕鈿
盒藏幽魄雙鬟致遠情偶因幻昧跡餘恨復分明

又

夢與夢相續南齊恰幾春釧餘琥珀冷虹逐美人新抱
影愁光燼蒙花可帶顰一般緘惜意終是女兒神

將訪龍夢先

龍先一日
以內艱去

寸管迥相接寧因數面親論交何所贈開匣未全貧落

落遠遊意瀟瀟風木晨感君倉卒際寄矚不辭頻

小樓夜集有贈

閒羨樓居好低回撤燭迎月來浮衿淨茶點入甌輕促
坐嫌分影吟秋非一聲相看澹不了何處復關情

水燈

懸知離火宅未肯背明棲一葉纔能汎中流此不迷楓
根逢月黑蘆渚覺風嘶殘燼飄何極熒熒早向西

胡端叔招飲月泉觀劇

一抹柔痕著眼鮮藏春十五故娟娟粧凝薄鬢將雛燕
藥抱紅心未放蓮歌板暫停殘照裏閒情早憇晚涼天
醉餘歸路迷泉影山月斜飛又欠圓

畫蘭詩

睡起慵多歌花骨雲情掩曖興復沒那用粉本借春工
偶然以意輕點拂曾聞此花最泥人低枝貪近女兒身
參差不避纖手摘兩兩癡婢苦遭嗔畫者何人差能似
蜂蝶留連誠何取夜深舉筆醺花神祇恐幽香蕩無主

過臨淮

真為濠濮想
恰恰好天時
遠水祿能活
晴雲宥有思
出籬羣野女
映櫟古叢祠
社喧成醉漁
歌日已晡
催歸迎小鳥
穩夢足南枝
莫問寒蘭興
初心未可期

閱董宗伯贈姚畫溪先生詩卷有述

初讀沁園詩
棣棣未可選
再讀沁園文
洪荒自迤演
前人大手筆
詎易撼其鍵
分路日爭馳
周行為蕪踐
發函失典刑
儼若具簪冕
辭條既豐蔚
腕勢信開展
錄似溪

上翁良辰相與撰吁茲晷畫間一水徐瀦轉古木拒雲
寒朝曦晚莫辨春陽一以敷風力失凝蹇流韻及後人
藹藹餘溫善黽勉互相期墻宇差無舛盥手幾摩挲遐
哉意方緬

新嘉驛感咏

淡墨隨烟擬向誰郵亭是處結相思欲知過客低迴苦
遺襪當年傳翫時

又

土花蝕盡不生春
啼笑匆匆識幻因
最是五更清夢杳
繞牀殘月獨窺人

又

繇來此恨好相關
且向東君暫破顏
那管三春風雨後
飛花瓣瓣在人間

家居偶感因和潘右安包氏園亭之作仍步子瞻
韻

豈必名園饒勝地
數椽且復問吾廬
花迎舞袖長年在

照返牆隅一半無好踞平泉醒酒石試拈金谷晚春圖
關渠何事巢梁燕歲歲添泥戲引雛

集賀公調署分得十四鹽

偶集因成醉來期不待占清言機互答默坐意俱恬好
戲非為虐同心或借砭月初臨隙牖風早避重簾燭淚
侵宵冷筇吹徹曙嚴暖須催鼓起寒亟覓衣添未覺主
人倦何辭良友淹清歌曳尾細花帽壓簷尖北客音同
鷓鴣吳儂笑是鹽

即席有二歌童頗纖
婉問之蓋南人云

羈懷殊悄悄酒趣

故厭厭低戀香光促誰堪別思兼倒觥聊自溼急口未
容稍路入斜陽莫天方衰草粘孤心隨幻蝶美翰惜雙
鷗率爾難為句枯腸許再拈

感往

甲子余計偕入都夢得句頗怪已而璫虎傳翼
虐焰肆張豈非識耶事後紀以韻語低諷再三
恍惚有人摸壁竊聽蓋不無餘怖云

往復天心不可知寒凝早已失冰澌幾年妖夢從誰踐

竟日微吟空爾思路有攬猿深護妾行逢豺虎忍啼兒
二語得之夢中未堪覺後重尋夢喜懼雙闕此一時

又

森森愁看雨雪零無憑燭曜待朝昕同心攜手將何往
痛哭裁書那可云鬼剝叢中千杵下甘棠亭側一盃分
荒榛寒夜低聲泣咽絕因風久始聞

又

期將風信準枯桑可但中流寄一航長者弔喪寧忍話

書生射策未全狂
機鋒後起須相對
意朕才萌盍早防
底蘊豈容口舌盡
五千文字較茫茫

又

抵掌誰能佐末籌
翺飛小智亦啁啁
不愁難長同癡木
乍戀忘機到野鷗
絕險載輸將伯助
褰裳竟渡為公憂

用公無
渡河語

須臾變滅成泡沫
穀洛于今可暫休

夏初自夾山莫歸

乍雨一番洗湖光
皎可看霽昏何所屬
曉暮亦云難綠

徧天同濕鴉飛照乃殘半因來往熟幽折得相安

又

分外添明秀如將山色矜層層停客舫點點着漁罾新
月光初引晴霞煖漸蒸森然餘一白臨視久無憑

留別劉暉吉司理

衙庭峰影簇如簪坐起行吟致盡酣政入委蛇君較得
夢成遷擾我何堪耶溪恰好乘春泛古穴曾聞列炬探
獨少清機相接取虛留雙屐越江南

又

一往孤畸不自禁驅來碌碌負初心尋聲未擬追良晤
託跡終能倚素襟梵夾乍舒時避溼葦簾低捲日愁陰
對君詎免為清態洗眼窓前照莫岑

過從母淨居感述

閨律通禪旨籬門晝反扃辭家知有託結願豈無靈器
鉢閒相守音文寂共聽春光許暫入一見草青青

又

所尚匪奇節恬然出素心嚴霜久可狎旭照恍初臨門
戶支何許中宵嘆不禁翻如身得度憬悟在情深

會稽宣繡方之上海顧繡適堪媲美友人見貽分
絲觀音一幅鍼鋒細貼殆類白描女工之佳者
也贊之以歌

心準手停不得語始見吳娘今越女天人冥接裁半方
晴搖香絡風輕舉避風亦復畏日色待倚繡牀徐拂拭
大士幻身藏指尖一絲飄斷一絲黏小聲低咒靈未答

飲容內向愁纖纖綠
茲一意催成幅穢
不能留香并觸
何如靜女自收藏
結取慈情照眉綠

夏日漫興

觸目凋殘淚暗傾
朝來初踏御街行
馬頭山色還依舊
喜聽塗人說太平

又

上林樹樹借棲烏
樹下何人轉轆轤
早晚入門先問主
就中誰苑復誰枯

又

眼前一勺即滄浪
傍午熿熿暑氣長
糞積泥犁堆面熟
也隨驢背入詩囊

又

無蚊恰稱晚涼天
高捲紗幮薄似烟
飽類櫻桃饑類絮
儘人坦腹詎妨眠

又

鎮日勞勞費送迎
夢餘塵土未全清
一般看到中天月

裁覺江南分外明

又

廟市爭趨朔望餘觀乎既往復躊躇稍羸月俸錢堪質
為檢攤門葉子書

又

厭聞折簡漫相呼酒肉淋侵下筋無且忍須臾隨例散
一匙濃茗勝醍醐

又

相逢曾否訂心交
早趁涼陰學架巢
笑我有時觸熱到
等閒熱客未須嘲

又

鄉思澤國渺難通
菱芡蘆花候畧同
百顆無絲持餉遠

冰盤初浸麝香紅

李有名麝香紅者種出薊州盤山味絕佳

又

昵昵留人獨有情
魏家釀法近知名
別饒香色添新妙

朝貴相遺只數甌

戚畹魏氏善造酒其名有五十餘種

又

近曉西風作意寒
衰荷夜半泣叢殘
分明官舍同僧舍
總有繁花不耐看

又

搖唇鼓翅憎蠅多
扇不能驅奈汝何
見說城南冤霧黑
新埋戰骨未銷磨

又

率然携榼即為羣
共簡藏書到日曛
依舊塵封兼鼠耗

可知讀律不論文

使署故事有簡書會時
一舉行主者攝飲而已

又

祇憑一靜遠多機
奕旨琴心參較微
勝固欣然敗亦喜
揮絃不了送鴻飛

凌忠介集卷一

欽定四庫全書

凌忠介公集卷二

明 凌義渠 撰

詩

連拔白髭數莖覽鏡有作

積塵而有身身為塵所隔相驅故相苦茫茫日煎迫隨
身小照子出入巾笥側聽汝告其誠為我通顏色有泉
竭自中津津不知歇有盃觸手碎英英護其缺全力敵

光陰輸此寸莖白黑白變化間白多豈勝摘一葉落知
秋風林坐蕭摵氣候命之然不霜焉可得

孫太君旌節詩

河水浩浩激平陸中有清流未全泮持茲匪石一片心
奪却千春紅與綠奉姑既婉撫嬰慈了此晨昏足饘粥
琬琰名留非所期祝取重泉聲影續自是哀樂關至性
五十年來類轉燭領選好用此輩人隔世隱隱如相勗
翹首天門霧色開海底珊瑚照初浴華表鶴引仙樂至

蒸蘭洩桂紛爾族旁人眼熱最繁枝
那識從前一枯木
枯榮嘯變固其常唯母永貽孫子穀

濠梁渡口

滿掬沙塵影泚然向此中鷗鳬隨俯仰
厲揭自西東寒
暴恒愁雪帆輕不問風潺湲如可聽
孤夢恰能通

除夜符離旅舍

姻友同茲地有懷各自持荒陂一飯澁
餘俗隔江疑所
賴歌吹杳稍憐杯酒遲客程應未半
華髮已絲絲

又

是夜皆難擲何言旅思憑蹄輪雖暫緩沙霧此相仍得
酒歡童僕叙年先友朋照來心厯厯微減半牀燈

春試偶以他事尼不得與閤園客同行途中恨之
宛爾同追逐重尋味似長稍期平日意引憇道途傍有
望兼晨夕將心照雪霜行行入淒澹不獨為離鄉

曉發河間道中

指屈前途日翻如望到家早行迷近遠輿夢任欹斜霧

壓村村路霜明樹樹花亦知寒氣薄官柳半藏鴉

採藤花

灌莽紛迴薄孤烟向此澄
盈筐秋瑟瑟過雨綠層層
藥炙新宜脯香飛遠供僧
攜羣終采采雅意託閒朋

補螺庵花影詩示閔園客兼寄潘穉生

丁巳讀書螺庵小友潘穉生戲取花影局置一
室窓牖間護以重幕間不通綆止留隙豆許引
光出入時覺冥蒙霏拂別具幻情予與閔園客

流連不已擬作小詩未果尋已八年矣

壁上互吞吐延之以隙光稍爭勢曲折如對月微茫久
視分鬚葉澄心映色香祇愁身漸幻欲向影邊藏

又

翻借無窮意酬茲有盡花風歸如乍卻日午看將斜小
謔藏機致濃情失嘆嗟與君同憶得有夢各幽遐

夏至齋居詩

是月陽疑壯羣陰如漸萌還持啟閉理以息陰陽爭同

患占民事退藏觀我生端居饒靜篤蔬食引虛明欲下諸
天影時聞松柏聲苔痕隨戶掩鶴夢與風清詎止心魂
寂將無寒暑平近瞻天咫尺落落寸珠擎

皇極殿成宴百官

天心如再朗豈樂萬方同儉德垂深永慈情及耄童瑞
分堯座膳卑準夏王宮聽默辰居北宣威日在東欣知
早歛福不覺嘆成功蓄蓋誠靡極明時許盡通

蜀客談蜀事

愁光點點逐妖開
歛魄徵魂遍九垓
槌盡玉樓天帝醉

一帆慈影趙洲來

天啟未改元前蜀中箕仙有言不久當亂殺人至二十餘萬上帝已遣趙

大洲巡行四川矣未幾逆奢之變前後殺傷數亦相當云

又

孤人子父寡人妻
帳下歌聲雜鼓輦
鬼妾那堪同鬼馬

風前猶得暫悲嘶

又

錦繖紅粧故自豪
戰酣卸甲注唇膏
遙傳此事堪圖畫

不向春牋問薛濤

紀秦良玉事

又

強拈紙筆轉生猜
短髮低垂恰覆顙
豈愁梢頭珍重意

憑郎驗取女兒胎

紀女秀才事

又

潮痕艷艷綠生烟
山到嘉陵水到渝
錦色迷離遮不斷

村村知近浴妃泉

蜀溫江古湍上也水性溫柔
士女清麗蜀人蓋侈言之矣

又

一話金風失慧芒憑教士女洗戎裝蜀人休訴攀留苦
終古恩威照此方

贈康貞元年丈

康曾大母幾百歲其大父母亦壽涉八旬一門
之內孝友淳篤近世所難詩以艷之

耕獵為生苦自持忍將榮譽割親慈文從拙處留真性
體在閒中逗遠思灝氣久知臨戶牖仁風自此出櫺莪
何來多祉偏宜壽迪吉維天不可私

擬古怨詩

引手得蓮子垂絲躍紫鱗等閒連袂出何處不如人

又

碧桃天上種幻作金錢花卻羨沾恩易房房映日斜

又

天然一靜女隨例鬪長蛾那必人言好蛾眉洵自多

又

莫嫌青梅澁迴味芬且甘君自愛荔枝飛騎填海南

容城早雨

氣象乍氤氲微茫曉未分層雲俄水起遠嶂覺雷殷
影霑將濕蟬聲咽處聞停車稍候霽幽意在初昕

中秋月食時舟泊濟上

敲銅救月迫含愁舫泊依然古渡頭人意惜惜燈黯黯
可知今日是中秋

賀馬邑侯題留考滿兼值太孺人初度榮封

春林漠漠草芊芊繞膝板輿近幾年為母以慈能腹衆

居官無礙類逃禪
徧沾醲味鄉人酒
平挹虛懷弟子員
已覺自公多暇日
舞衣新試錦文鮮

曉發感懷

草草寢興裏舉頭
簷際看無心
申苦意有夢
各艱難霧
欲沿溪出星留
配月殘問余何
所慕脂轄未容
安

陽穀店

行行墟落晚倦若
鳥投林村釀難
成醉浮涼乍滿
襟預
愁千嶂皆夢繞
綠烟深殊怪秋
聲早為來颯颯
音

長安肆中有擁書甚富而秘不示人詩以異之

古香拂拂手摩挲為惜年珠賸幾多憑仗血誠通姓字
一編高擁意如何

恭遇聖壽雪中朝賀

禁鑰沉沉聽未終驚翻初日夜光融輸成玉粒三千斛
製出瓊綃十二宮

又

十月輕寒早賜貂同雲覆徧喜先饒幾回飛舞迎仙仗

漸近階墀一半消

又

憑將光相問瞿曇
縷縷添長日近南
解道六花能比壽
峩睂深處萬年龕

又

佇看朝暉即瞳矐
萬國傳觴此日同
寸草春暉無限意
聖心偏在沍陰中

晚宿尹村見新月

憶向長安別還隨此地親光從今日始影若與年新乍
覺因春嫵非關對客顰一般愁寂意留伴未歸人

梁原鋪讀沁水張侍御壁間詩

懶將舊恨話殘宵知有遺靈尚可招偶爾題橋懷古意
墨波黯黯未全消

人日過沙河縣

縣以沙為榜迎風寸寸沙歸程輕似鴈驛使幾逢花往
事碑能記寒流日已斜叢臺知不遠拭眼照繁華

越州城外山水

愛說越中遊茲遊謂未足何緣登厯遍止從近郊矚有
意發其光接之以冥穆到眼了無倪濃淡不相屬徑過
寘莫問關我神明俗背客退而尋魂情如再續譬若涉
異書一字味徐觸髣髴共高士無言容止肅豈必際秋
冬有懷始傷獨頗悟晉人云周玩不在目岫勢未全殊
湖光看旋狀亭臺餽其間一一綴明淑擬將西湖較霜
旦與晴旭同異且莫分永依山水福

自邯鄲之磁州

風日朝來爽山原四望通有懷悲逝水無語送飛鴻公

子俠遊窟佳人紈綺叢參差那可問一線枕痕中

邯鄲有呂

仙黃梁舊

蹟故云

又

早覺神仙天何言霸業銷臺餘烟點點嶂列翠迢迢宿
案誰能了悲歌差足豪載馳遊子意敢訴去程遙

茶池

池為近溪先生令太湖時遺蹟亭有碑記可讀
乃歸善楊先生手筆也

湖山疊若屏偶作湖山長以茲贈往來盡日風泉想

又

銜碑知有淚勒頌已難銘強覓茶中味居然識典刑

又

莫詫溪頭澁烟巒處處新春風吹不盡時遇採茶人

西陵韓城驛不寐

金大正八年三月
卷二
幾年燈火傍禪棲
纔識桃源路已迷
血咯涎枯何所恨
聲聲聊學子規啼

又

迢迢村漏夜如何
夢到崎嶇聽乍訛
莫負寒雞聲第一
好教人羨鯽魚多

使竣還里發自蘄上

步步流泉引逕斜
竹籬深映兩三花
暖當蔬甲濃熏麝
烟薄枝頭翠作衙
已覺鄉心從此整
為憐春事幾分賒

驅車那惜衝風雨記得歸鞭旋及瓜

黃梅苦雨

未覺風心善陰晴候屢猜山山埋照盡樹樹抹雲來拚
睡唯欹枕拈香淨宿埃可知春已老愁說到黃梅

皖城署中卧病

翦春風雨何豪道蟲鳥盡日聲喧啾眼前怪物紛如虺
或據其胸館其後天用疾厄為予壽媿我苦吟成細瘦
嗟哉有命蝸為宮臂股跼蹐半幅中頽然笑憶雞栖翁

望九華得綠字

色類紛難極峰峰勢蜿蜒名從初地識景自昔人箋

初山

名九子太白
始改為九華

一抹清空氣無邊華髮漫天嗟予行役倦與

訂異時緣

三月三日陵陽雨行

最憐春易暮宿雨可能收裝薄寒猶在烟輕綠徧浮僕
夫敢告倦孤意自難留望望鄉關近翻成歷亂愁

雨泊雒城北渚

亦復迎烟泊寒塘雨漫流綠澄孤舫內蟬咽五更頭對
影悄成獨兼風颯若秋絲絲遮不住所得是濃愁

汎畫溪

短棹徐相引沿洄聽所尋山餘藏露態雲幻有無心細
樹低縈拂平灣挹靜深悵然增興緒那問暮烟沉

無題

託意深深未敢言回燈乍復憶消魂遠山近莫浮睂色
蓮子初開隱笑痕可代忘憂書滿幅避人私語月當門

孤情恰共蘭心婉
歌筆凝思坐小軒

雜感

何處相關覺可憐
看痕依約曉燈前
早知妾命輕于葉
便入歡場也黯然

又

翻因顛顚識客姿
病到披離好自持
欲訂同心愁決絕
花開風裏不多時

柳枝詞

一枝低趁却沾塵不耐封姨作色嗔
好把愁絲收拾盡
章臺容易逐他人

又

幾度更衣未忍辭回眸那敢說恩私
乍思憐母還憐婿
背立無言獨忖時

再同逸卿小集

及爾徘徊久閒雲似此心預聞愁折柳
何可聽鳴磬擁
髻神先頓遲盃意共惜所嗟霜露晚珍重託秋深

初寒學為險句

落落自朝昏殘陽逗遠村百蟲早緘口螢翅尚遊魂虛
室添幽響荒畬雜燒痕石欄蕉半折掀頓也頻頻

又

樹瘦麻姑面花癩戚姬身有望皆髡頂無方辟蘇塵鬼
車鳴類哭饑隼怒而蹲咄咄將何許垂頭但飲醇

燈市歌

眼迷真贗底相蒙傍午喧闐僦幾叢斷竹焦桐隨意識

鏤脂畫卯總輸工

又

雙扉晝鍵寂無悰
緩轡邀羣信所從
免得歸來添惋惜

唐碑晉帖可曾逢

又

南粧強學黛重描
月下逢迎手並招
夜色天街澄似水
低頭早過第三橋

又

翻得昇平調若何燭香影裏醉婆娑任教百戲隨宜鬧
也遣春宵點綴多

南還輿中有作

不免馳驅苦恬心與徜徉塵因雨後減日似客程忙早
映紅叅白新條綠漸蒼常嫌睡欠足未擬夢家鄉

芳蘭怨

合歡明月詎須論夢入湘沅乍返魂無可篆心香一點
將何寄遠淚重痕早嫌腕弱寧辭拙為怯風多許護存

擲向道傍薪共束銜恩未敢冒稱恩

代語

又

數枝絨慎過南金忍遣塵沾與蠹侵日落小窓頻送眼
天寒翠袖好關心初疑幽谷無人問再慮危芳墮砌深
口嚼蓮須應獨苦銜孟不語到而今

代解

滁陽燕亭午憇時與虞素心同卿談文

空靄如相逼層層隱古滁煮茶當晝迥借榻得風徐素
尚周旋外文情點畫餘炎歆殊未歇戀此待何如

夜抵大柳樹驛率成十韻

不信人如螳循坡厯幾盤有懷從此永我馬亦云憚足
繭容偷轉歌勞許暫安淡濃雲皺墨遠近岫含丹聚族
蚊雷逐攢聲蛙部謹星光摘未落月魄照初寒微雨沾
肌爽涼飈薦枕單他鄉言采杞舊俗忍鉏蘭卑跡耽夷
寂深衷託險難停車一飯足疏糲腐儒餐

白嶽園感夢

桃花漠漠信全乖中夜波濤急似淮髣髴呼名纔兩字

伴人幽獨到天涯

固鎮驛折殘榴花

惜將叢艷委塵沙
恣汝輿臺插鬢斜
點點猩紅滲血冷
隔船商女怨琵琶

宓妃詞

紅蕖小襪襯波輕
取次仙槎駕水行
抵死魅郎懣未得
黑甜影裏誤卿卿

紅夾溝桃林諸處

柔颺聽入總騷牢踏踏荒原靜不驚
厯劫猶餘風氣朴
論材獨讓古人豪
饑烏負影窺斜日怯馬奔嘶阻亂濤
著眼蒼茫看漸熟
澆愁那復借村醪

馮氏雙節詩為陸貞姑賦

擘韻中還苦絲絲詎易忘
燈光扶影怯機杼入秋忙
散髮俄垂老話心晚更長
未嫌霜霰逼留驂返魂香

又

撚管丹初拭敲銅血盡枯
已甘井底水那問夜啼烏抱

泣惟之子扶床有小姑纔疑風日暖迴味可如茶

渡滹沱河

硬將脚力當雙戟出沒蒼烟信馬馱時值冬初風漸緊
望窮天末雁頻過為防石截難移趾愁見津迷且細哦
霍霍水聲爭上下也知舊事幾銷磨

趙州柏林寺

寺有真際老人石刻雙影

鬱然青數點遂以柏林稱來止初瞻影迎門僅有僧平
懸千尺水幻接幾枝燈但不迷真際隨宜閱廢興

柏鄉公署看月

獨夜清如許何能遂掩扉庭空滋皎皎葉墜故飛飛當
食頻停箸侵寒未授衣燈花挑更結差以慰將歸

又

偶然月下立私自惜幽涼悵望雲千里裁書雁幾行霜
威入鬢早燭焰照愁長指我棲遲路低頭愧未遑

沙河道中

寒氣初濃風漸加日光斜逗冷沉沙皚皚恍憶峰前雪

獵獵真同塞下花
欲落羣鴉千萬點
纔添荒戍兩三家
回看夾道垂殘柳
百念攢心未有涯

邯鄲呂仙祠

我行邯鄲道意中
何恍惚艷事併雄圖
經秋同一抹強
問道傍人無言指空碧
眼前死復生頭上出
還沒成功
啟將來譬馬馳一驛
菁華俄告盡委擲等遺跡
余猶虱處禪故與天機隔
小兒夢含桃頻向枕邊覓

又

愚人耽穢濁達士慕幽玄濃淡各有適未謝區中緣非
無得道者妄想墮徽纒尊或為世主次不失宰官試評
雲水趣何如將相權倉卒難置對物情從所便免俗聊
為爾尋仙亦偶然

三月一日乘雨入天竺

更無餘物佐檀施真素為心喜獨持輿路從他催雨急
鼻香細細到松枝

又

泥塗匍匐可愁難祇取勞軀向北安
慧照愚誠各蠢蠢
慈悲不作兩般看

又

隨緣稽首復何求
默共山情指點幽
遶耳號呼忽涕淚
榮期三樂我能酬

三至湖上

又依湖柳聽綿蠻
略數浮踪三往還
寂寞終難辭世役
驅馳豈敢避時艱
勉留筆楮慙私負
誤隔烟雲面久頑

隨衆招搖同一到有何幽緒與相關

酌突泉涸久復涌頓還舊觀

澄泓聽視內尋脉孰源委甃石護以欄晴雷殷鼎扇曉
瞰素氣浮急雨光珠碎妄作海眼觀穴深不穿隧清濟
恒伏流隱顯非一類堪嗟已卯春泉靈忽中閤豈止地
肺渴得無天帝醉蓄泄若有神茲理詎茫昧竭來正秋
初再見驚破潰響震空外流屏惡薰洗穢漸占年用康
棄戈畜牯特運會無終極回環判榮悴對之忘百憂一

笑發濃寐

美人蕉

屏却秋聲倚冬旭數枝的爍映深綠粲粲流光及戶庭
欽向朱顏笑未足插瓶入鏡添多態穠華蕭瑟宛相代
那得雪片罩嬌姿摩詰圖中觀自在誰言花耐百日紅
此紅寧與俗艷同唯願抽心守芳素莫令長被顏色誤

過白雪樓

近城十餘里有鮑山
為于鱗先生讀書處

漠漠高懷託一林問公曾否此栖尋樓仍舊閣誰賓主

代有新詩孰古今
早悟榮衰已屬幻
果經游止不須深
鮑山山石遙堪語
餘雪猶將寒早岑

歷城貴君招遊華不注是日輕陰微雨

孤峰冷插晚秋天
叅錯陰晴望更妍
獨涌筍株青蔓蔓
小舒蓮瓣淨娟娟
遊情一往爭危石
幽感頻生觸暗泉
醉上小輿歸路暝
高低崖壑看平懸

鴛鴦果

連房迸裂氣方淒
具體雄雌翼未齊
初發驟疑霜入罅

羣遊錯憶月隨谿啾啾一殼啼相向宛宛雙頭夢乍低
信是行成七十二總然折隊不單棲

又

不趁遊龜葉底蓮覆窠顆顆寄層顛剖開如怯初分項
煨熟宜呼小比肩那忌鳥窺來上下祇愁蟲蛀隔中邊
長安兒戲乘秋賭探得雙枚亦偶然

晝靜

耀晷正當天午餘仍未緩避熱且閉門細簞足舒展墻

頭雀未停戶外蠅方滿小僮倚壁睡迎涼恣偏袒文史
任堆前意慵目力淺聊刷面上塵層層付清盥囂寂竟
何常去市止一版偏愛晝能閒不畏暑方喘徘徊幾歲
時日影忽西轉微聽颯颯聲槐陰來別館

乙亥春日

黯黯城隅結午陰風花過眼弗堪尋依方覓睡猶嫌淺
挈伴尋山未覺深不少訛言姑妄聽且隨浩劫學安心
詩人握粟誠何意出處無憑匪自今

又

也知理亂數難爭人事乖違私未平何地從容承日影
普天畢剝戰秋聲魂依蒲稗溝邊骨淚濕胭脂馬上情
直逼寢園堪慟哭兵戈無乃太縱橫

又

乖戒由來歎積薪徐思致變豈無因官須刻急方稱健
人到流亡始疾貧白屋按戈嗔作語園扉入夜冷飛燐
緩刑薄稅尋常藥聚口攢眉容易陳

又


遲日端居亦少歡
人情蹙蹙太無端
農乎失業爭投耒
士也憂時願解冠
見說趨朝誠孔亟
忍云藏野已粗安
天心佇望時來復
氣繞中都龍正蟠

三月晦日贛榆道中作

路歧南北幾追攀
聽報前旌始度關
漸穩客心知夢坦
暫離官樣得身閒
鄉思早掛天邊樹
望眼先迎淮上山
帶有餘寒寒倍劇
鶯花未擬放春還

又

情牽物役祇匆匆
略識春光春又終
官路有程難併日
荒原無畫不嘶風
成叢薺麥踈蕪密
夾植桃梨白映紅
曾記昨年來此際
赤氛千里正途窮



凌忠介集卷二